

UMP jalin kerjasama baik dengan pengamal media



Kuantan, 15 April- Universiti Malaysia Pahang (UMP) menganjurkan Majlis Santai Makan Malam Media bersama UMP bagi meraikan pengamal media dalam mengekalkan hubungan baik kedua-dua pihak.

Hadir memeriahkan program Naib Canselor UMP, Profesor Dato' Dr. Daing Nasir Ibrahim, Presiden Kelab Media Pahang, Dato' Nik Naizi Husin dan Pendaftar, Abd. Hamid Majid.

Menurut Dato' Dr. Daing Nasir, program ini bertujuan meraikan dan menghargai jasa yang disumbangkan oleh pihak media kepada pihak universiti selain dapat mengeratkan lagi hubungan.

"Universiti juga sentiasa mencari ruang untuk menganjurkan aktiviti-aktiviti yang boleh mendekatkan pengurusan universiti dengan warga media. Alhamdulillah, dengan publisiti dan liputan meluas yang telah diberikan oleh pihak media selama ini, masyarakat awam kini telah mengenali UMP dan mengetahui peranannya dalam melahirkan jurutera dan teknologi yang berdaya saing.



Katanya, UMP sangat berbesar hati mendapat kerjasama yang tidak berbelah bagi daripada pihak agensi media.

Berkongsi tentang perkembangan universiti, Dato' Dr. Daing juga memaklumkan beberapa program anjuran universiti akan diadakan dalam masa terdekat termasuklah Festival Antarabangsa Inovasi Teknologi Hijau (I-Finog), Hari Kerjaya dan Cendekia Bitara.

UMP juga bakal mengadakan Misi Kemanusiaan Aceh: We Love We Care dengan kerjasama Fakulti Teknologi Kejuruteraan dan Persatuan wanita UMP (Matahari) di Pesantren Dayah Nurul Huda yang diadakan 2 hingga 5 Mei depan bagi membantu golongan anak-anak yatim dan ibu tunggal serta keluarga susah yang masih serba kekurangan dalam mendapatkan memerlukan keperluan asas yang lebih baik.



Selain itu, UMP juga bakal menjadi tuan rumah penganjuran Anugerah Tokoh Siswa dengan kerjasama Kementerian Pendidikan Tinggi yang bakal diadakan pada 23 April ini di Kompleks Sukan UMP Gambang.

UMP juga giat berinovasi bagi melahirkan suasana pembelajaran yang kondusif yang dapat melonjakkan kegemilangan UMP dalam merealisasikan Pelan Strategik UMP (2016-2020) yang bertemakan memasyarakatkan teknologi.

Beliau mengharapkan banyak lagi aktiviti dapat dijalankan antara UMP dengan pihak media bagi mengukuhkan jalinan yang sedia ada agar terus berkekalan. Lebih 50 dalam kalangan ketua biro dan pengamal media hadir dalam majlis yang berlangsung di Restoren Iseefood Kuantan.



Disediakan Unit Perhubungan Awam, Bahagian Komunikasi Korporat PNC.Foto oleh Naufal Samsuddin

Posted By : NOR FADZILLAH BINTI ZULKIPLI Date Posted : 19-04-2016, 10:26:12